

La farsa da l'Hotel Scuol Palace cuntinua

Eir il terz inchant dal indriz d'hotel es gnü revochà l'ultim mumaint

Il destin da l'Hotel Scuol Palace a Nairs resta inavant intschert. Davo cha eir il terz clom d'Inchant es gnü revochà, pudess uossa il cumün da Scuol dar ün stumpel a la fatschenda spinusa.


JON DUSCHLETTA

La Friedman scri es possessura da l'implant da cura Scuol-Tarasp, da l'Hotel Scuol Palace. E quai adonta cha la Friedman scri ha serrà las portas da l'hotel avant raduond duos ons. Els vaivan gesti l'hotel in möd coscher d'ürant trais ons. A'l cumün da Scuol es la Friedman scri debit impostas da raduond 25 000 francs. Illa prosma sezzüda voul uossa eir la suprastanza cumünala decider sur dal agir in chosa.

La società simpla «Clemgia Tarasp» vaiva dal 2007 vendü l'Hotel Scuol Palace a la Friedman scri, davo cha trattativas cul Robinson Club, chi gestiva l'hotel fin là, nu d'eiran gratagiadas. La «Clemgia Tarasp» da la G. Testa & Fratelli Triacca AG es per listessas parts in possess da las famiglias Testa e Triacca. Markus Testa ha confermà a la Posta Ladina, ch'els hajan retrat la dumonda d'inchant da l'hotel in venderdi, cuort avant mezdi. A las ünndesch vaiva la società «Clemgia Tarasp» survgni il transferimaint da raduond 60 000 francs. Uschè cha Otto Huber, da l'uffizi da scussiu En a Sent, nun ha gnü otra schelta, co da revochar l'inchant ün'ulteriura jada. L'inchant d'eira terminà per las 15.00.

Co vaja inavant cull'istorgia?

Tenor Markus Testa prevezza il contrat d'impraist tanter la società «Clemgia Tarasp» e la Friedman scri il pajamaint da trais jadas 150 000 francs l'on. Quai per pajar inavò l'impraist da raduond 3,7 milliuns francs. La prosma rata es terminada sün la fin da schner 2013. Testa ha declerà, cha actualmaing es la Friedman scri debita da raduond 450 000 francs. Uschè sun amo avertas las ratas dals mais avrigl ed avuost plainamaing, e tala dal december parcialmaing. Per Testa ün gö stantus. Il proceder es adüna il seguaint. La «Clemgia Tarasp» po inoltrar la scussiu, la Friedman scri cun lur advocat Guido Lazzarini pon far opposiziun legala, la risposta dals credituors es la dumonda d'utilisaziun. Pür davo tuot quist segua la procedura d'inchant. Tuot in tuot üna via chi düra mincha jada divers mais. Mar-



I'l Hotel Scuol Palace regna ün'atmosfera da temps passats. Guardond tras la fanestra illa sala para cha'l temp saja stat salda per decennis.

fotografia: Jon Duschetta

kus Testa as giavüschess perquai, cha il cumün da Scuol gnis activ in chosa. Lur via füss plü directa ed eir plü cuorta, uschè Testa.

Interessents füssan avant man

La Friedman scri less vender l'hotel per raduond 4,3 milliuns francs. I vain speculà, cha quist import cuverness tuot ils debits da la società. Tenor Otto Huber sun cuntshaints duos interessents chi lessan cumprar il stabilimaint. In vista a gronds cuosts per la cumprita, la sanaziun ed il mantegnimaint da l'hotel es la summa cha Abraham Friedman less, utopica. Quai almain il parair dals intrachats.

La società fundaziun Nairs, sco vashina directa, vaiva comunicà fingià oravant seis interess vi dal stabilimaint. Cun lur proget «Global Village for the Arts» sun els eir ils unics chi han avant man ün proget concret public per l'adö-

ver da l'Hotel Scuol Palace. Il president da la fundaziun, Hans-Jörg Heusser, ha confermà invers la Posta Ladina; ch'els füssan stats pronti da's participar a l'inchant. Quai hl dit Heusser in venderdi davant la porta serrada da l'Hotel Scuol Palace, dischillus da la revocaziun da l'inchant. Insembel cun la fundaziun Edith Maryon da Basilea füssan els stats pronti d'offrir ün tshert import. L'otezza da quist import nu vulava l' però tradir.

Heusser ha muossà inчетta invers l'agir da la Friedman scri, chi voul vender «la pel» uschè chara sco pussibel. Ch'els pensan però a favur dal stabilimaint sco monumaint d'art e naturalmaing i'l sen da la fundaziun e la regiun. Christof Rösch, il manader artistic dal center per art contemporanea Nairs, temma, cha quista situaziun dozza il privel d'acts da vandalissem invers l'hotel.